

Asas-asas Keimanan

Daripada Ibn Umar R.Anhuma, Rasulullah SAW bersabda:

خَمْسٌ مِنَ الْإِيمَانِ، مَنْ لَمْ يَكُنْ فِيهِ شَيْءٌ مِنْهُنَّ فَلَا إِيْمَانَ لَهُ: التَّسْلِيمُ لِأَمْرِ اللَّهِ، وَالرِّضَا بِقَضَاءِ اللَّهِ، وَالتَّقْوِيَةُ إِلَى اللَّهِ، وَالتَّوَكُّلُ عَلَى اللَّهِ، وَالصَّبْرُ عِنْدَ الصَّدْمَةِ الْأُولَى.

Maksudnya: “Lima perkara daripada keimanan, siapa yang tiada satu daripadanya nescaya tidaklah sempurna iman baginya: Menyerah kepada segala urusan Allah, reda dengan qadak Allah, menyerahkan diri kepada Allah, tawakal kepada Allah dan sabar ketika permulaan bencana.”

Riwayat al-Bazzar dalam Musnad

Pedoman dan Iktibar Hadis

Antaranya:

1. Iman merupakan asas yang utama kebahagiaan manusia kerana dengannya manusia selamat hidup di dunia dan juga di akhirat. Dengan berlandaskan iman, manusia menjadikan neraca utama ialah kitab Allah dan Sunnah Rasulullah. Ia mengambil kira keredaan Allah dan menjauhi kemurkaan-Nya.
2. Sayid Sabiq dalam kitabnya *Akidah Islam* berkata: Akidah sebagaimana yang diuraikan oleh Allah SWT dijadikan umum dan merata untuk seluruh umat manusia, kekal sepanjang masa, kerana sudah nyatalah bekas-bekas kemanfaatan dan keperluannya, baik dalam kehidupan perseorangan ataupun perkembangan masyarakat ramai.

Oleh itu, teranglah bahawa akidah atau kepercayaan di dalam hati dan jiwa adalah setepat-tepat jalan yang wajib dilalui untuk menimbulkan unsur-unsur kebaikan yang dengan bersendikan itu akan terciptalah kesempurnaan kehidupan, bahkan akan memberi saham yang paling banyak untuk membekali jiwa seseorang dengan sesuatu yang lebih bermanfaat dan lebih sesuai dengan petunjuk Tuhan.

Bentuk pendidikan semacam ini akan memberikan hiasan kehidupan dengan keindahan dan kesempurnaan di samping dinaungi dengan naungan kecintaan dan kesejahteraan.

Iman yang menjadi tunggak dalam kehidupan manusia untuk mencapai keredaan Allah kerana dengan iman mereka akan mencapai kehidupan yang penuh dengan kebahagiaan. Justeru, sewajarnya kita mendalami permasalahan iman begitu juga mengetahui berkenaan dengan perkara yang boleh membatalkan iman.

Mutiara Hikmah

- ❖ **Pujangga berkata:** Kami meninggalkan sembilan daripada sepuluh yang halal kerana khuatir syubhah atau masuk dalam perkara yang haram.
- ❖ **Pujangga berkata:** Selawat dan salam ke atas Rasulullah SAW yang *maksum* yang akan menghilangkan kegundahan, yang membuang keresahan, yang menyembuhkan hati terluka, membukakan pintu ilmu dan dengan ilmu tersebut diperolehi keutamaan yang telah dibahagi-bahagi.

Kisah Teladan

Mutharrif bin Abdullah al-Sakhir (salah seorang salafusoleh terkemuka) dalam biografinya mengatakan: Saya datang dari bukit Basrah menuju ke negeri Basrah untuk melaksanakan sembahyang Jumaat di Masjid Jamek Basrah. Saya datang sejak malam hari. Jika saya datang pada malam hari, saya akan menziarahi kubur. Saya selalu mengucapkan salam dan banyak berdoa untuk mereka. Namun pada suatu malam, sewaktu hujan turun dengan lebatnya dan udara yang sangat dingin, aku tidak pergi menziarahi kubur.